

Na osnovu člana 24. stava 4. Zakona o zaštiti stanovništva od zaraznih bolesti ("Službene novine Federacije BiH", broj 29/05), federalni ministar zdravstva donosi

PRAVILNIK
O UVJETIMA U POGLEDU STRUČNE SPREME
ZAPOSLENIKA, TEHNIČKE OPREMLJENOSTI, PROSTORIJA I DRUGIH UVJETA KOJIMA MORAJU
UDOVOLJAVATI ZDRAVSTVENE USTANOVE, PRIVREDNA DRUŠTVA ODNOSNO FIZIČKE OSOBE-
OBRTNICI ZA OBAVLJANJE DEZINFEKCIJE, DEZINSEKCIJE I DERATIZACIJE

I. OSNOVNE ODREDBE

Član 1.

- (1) Odredbama ovog pravilnika propisuju se uvjeti u pogledu stručne spreme zaposlenika, tehničke opremljenosti, prostorija i drugih uvjeta kojima moraju udovoljavati zdravstvene ustanove, privredna društva odnosno fizičke osobe - obrtnici za obavljanje preventivne dezinfekcije, dezinsekcije i deratizacije kao opće mjere za sprečavanje i suzbijanje zaraznih bolesti (u daljem tekstu: preventivne DDD mjere).
- (2) Odredbama ovog pravilnika propisuju se i uvjeti u pogledu stručne spreme zaposlenika, tehničke opremljenosti, prostorija i drugih uvjeta kojima moraju udovoljavati zdravstvene ustanove koje obavljaju protuepidemijsku dezinfekciju, dezinsekciju i deratizaciju, kao mjeru za suzbijanje širenja zaraznih bolesti (u daljem tekstu: promepidemijske DDD mjere).

II. PREVENTIVNA DEZINFEKCIJA, DEZINSEKCIJA I DERATIZACIJA

Član 2.

- (1) Preventivne DDD mjere mogu obavljati zdravstvene ustanove, privredna društva odnosno fizičke osobe - obrtnici (u daljem tekstu: pravne i fizičke osobe) ako za obavljanje te djelatnosti imaju odobrenje federalnog ministra zdravstva.
- (2) Odobrenje za obavljanje preventivnih DDD mjera koje uključuje upotrebu otrova I grupe daje se pravnim i fizičkim osobama iz stava (1) ovog člana na period od tri godine.
- (3) Odobrenje za obavljanje preventivnih DDD mjera koje uključuje upotrebu otrova iz II i III grupe daje se pravnim i fizičkim osobama iz stava (1) ovoga člana na period od pet godina.
- (4) Rokovi iz st. (2) i (3) ovoga člana teku od dana izdavanja odobrenja iz stava (1) ovog člana.
- (5) Otrovi I, II i III grupe nalaze se na listi otrova koji se mogu stavljati u promet u Federaciji Bosne i Hercegovine u skladu sa Rješenjem o utvrđivanju liste otrova koji se mogu stavljati u promet u Federaciji Bosne i Hercegovine ("Službene novine Federacije BiH", broj 50/08).

1. Uvjeti stručne spreme, tehničke opremljenosti i prostora

Član 3.

Pravne i fizičke osobe iz stava (2) člana 2. ovog pravilnika moraju zapošljavati u radnom odnosu na neodređeno vrijeme s punim radnim vremenom najmanje:

- a) jednog doktora medicine-specijalistu epidemiologije ili higijene sa ekologijom
- b) jednog diplomiranog sanitarnog inženjera/bakalaura-reata zdravlja i ekologije,
- c) četiri kvalifikovana izvršioca (diplomirani sanitarni inženjeri/bakalaureati zdravlja i ekologije ili tehničara sanitarno-ekološkog smjera).

Član 4.

- (1) Odgovorna osoba nosilac odobrenja iz stava (2) člana 2. ovoga pravilnika jeste doktor medicine - specijalista epidemiologije, higijene ili toksikologije.
- (2) Odgovorne osobe za provedbu preventivnih DDD mjera i svi izvođači preventivnih DDD mjera moraju imati dokaz o završenoj stručnoj obuci iz oblasti DDD-a, te se moraju kontinuirano stručno usavršavati u skladu sa ovim pravilnikom.

Član 5.

Pravne i fizičke osobe iz stava (2) člana 2. ovog pravilnika, u smislu opreme, moraju imati najmanje slijedeće:

- a) Oprema za rad:
 - 1) dva MASTER aparata, ULV nebulizatori,
 - 2) dva topli zamagljivača kapaciteta pet litara,
 - 3) dva uređaja za hladno orošavanje - generator aerosola,
 - 4) četiri ledne motorne prskalice sa dodacima za zaprašivanje i granuliranje,
 - 5) jednu prskalicu sa sigurnosnim ventilom kapaciteta pet litara atestirane na pritisak od tri bara za svakog izvođača preventivnih DDD mjera,

”Službene novine FBiH”, broj: 81/14

- 6) jedan uređaj za detekciju plinova sa dovoljnim brojem odgovarajućih indikatorskih cjevčica ili senzora za fumigante koji se koriste u radu,
 - 7) odgovarajuća dodatna oprema za primjenu fumiganata (dozator i evaporizator ovisno o vrsti plina koji primjenjuju),
 - 8) frižider,
 - 9) opremu za hloriranje vode,
 - 10) komparator,
 - 11) dva namjenska vozila za prevoz ljudi, materijala i opreme.
- b) Zaštitna oprema za svakog izvođača DDD mjera:
- 1) gumene čizme,
 - 2) gumene ili kožne rukavice otporne na hemikalije,
 - 3) dovoljne količine rukavica za jednokratnu upotrebu,
 - 4) zaštitni kombinezon, mantil ili ogrtač, štitnik za lice ili zaštitne naočale, kape i kacige,
 - 5) zaštitna sredstva za zaštitu organa sluha.
- c) Posebna zaštitna oprema prema vrsti posla koji obavlja, za svakog izvođača preventivnih DDD mjera:
- 1) jedna maska za cijelo lice za svakog izvođača koji je ovlašten raditi sa preparatima za DDD iz I grupe otrova,
 - 2) dovoljna količina plinskih filtara propisanih i prilagođenih fizikamo-hemijskim svojstvima pojedinog plina,
 - 3) najmanje 3 (tri) samostalna uređaja za disanje s otvorenim krugom na komprimirani zrak ili sa zatvorenim krugom,
 - 4) uređaj za primjenu kisika kroz najmanje 30 minuta,
 - 5) za svaku samostalnu ekipu komplet prve pomoći opremljen antidotima za sve otrove sa kojima se radi kao i osnovnim simptomatskim lijekovima u slučaju trovanja, tlakomjerom, stetoskopom, te uputom za primjenu prve i medicinske pomoći u slučaju otrovanja.

Član 6.

- (1) Pravne i fizičke osobe iz stava (2) člana 2. ovog Pravilnika moraju imati vlastiti poslovni i skladišni prostor usklađen sa propisom koji reguliše promet otrova.
- (2) Izuzetno, skladišni prostor može biti i zakupljen, ali zakup mora biti definiran najmanje na period izdavanja odobrenja.
- (3) Skladišni prostor iz stava (1) ovog člana mora imati:
 - a) zasebnu prostoriju za smještaj, čuvanje i izdavanje I grupe otrova,
 - b) prostoriju za čuvanje tehničke opreme i aparata za primjenu,
 - c) prostoriju za čuvanje zaštitne opreme,
 - d) prostoriju za administrativno osoblje,
 - e) poseban sanitarni čvor s tuš kabinom,
 - f) prostoriju za garderobu sa po dva garderobna ormarića s zaštitnom bravom (katancem) ili ključem za svakog radnika u skladištu (jedan za radnu odjeću i lična zaštitna sredstva, a drugi za ličnu garderobu).

Član 7.

Pravne i fizičke osobe iz stava (3) člana 2. ovoga pravilnika moraju upošljavati u radnom odnosu na neodređeno vrijeme sa punim radnim vremenom:

- a) jednog doktora medicine ili diplomiranog sanitarnog inženjera/bakalaureata zdravlja i ekologije sa pet godina radnog iskustva na istim poslovima sa edukacijom iz oblasti DDD poslova u skladu sa ovim pravilnikom
- b) jednog diplomiranog sanitarnog inženjera/ bakalaureata zdravlja i ekologije,
- c) tri kvalifikovana izvršioca (diplomirani sanitarni inženjeri/bakalaureati zdravlja i ekologije ili tehničara sanitarno-ekološkog smjera).

Član 8.

- (1) Odgovorna osoba nosioca odobrenja iz stava (3) člana 2. ovog pravilnika jeste doktor medicine ili diplomirani sanitarni inženjer/bakalaureat zdravlja i ekologije sa pet godina radnog iskustva na istim poslovima sa edukacijom iz oblasti DDD poslova u skladu sa ovim pravilnikom.
- (2) Odgovorne osoba za provedbu preventivnih DDD mjera i svi izvođači preventivnih DDD mjera moraju imati dokaz o završenoj stručnoj obuci iz oblasti DDD-a, te se moraju kontinuirano stručno usavršavati u skladu sa ovim pravilnikom.

Član 9.

Pravne i fizičke osobe iz stava (3) člana 2. ovog pravilnika, u smislu opreme, moraju imati najmanje slijedeće: a) Oprema za rad:

- 1) dva topla zamagljivača kapaciteta pet litara,
- 2) dva uređaja za hladno orošavanje - generator aerosola,

”Službene novine FBiH”, broj: 81/14

- 3) tri leđne motorne prskalice s dodacima za prskanje, zaprašivanje i granuliranje,
- 4) jednu prskalicu sa sigurnosnim ventilom kapaciteta pet litara atestirane na pritisak od tri bara za svakog izvođača preventivnih DDD mjera,
- 5) dva namjenska vozila za prevoz ljudi, materijala i opreme.
 - b) Zaštitna oprema za svakog izvođača DDD mjera:
 - 1) gumene čizme,
 - 2) gumene ili kožne rukavice otporne na hemikalije,
 - 3) dovoljne količine rukavica za jednokratnu upotrebu,
 - 4) zaštitni kombinezon, mantil ili ogrtač, štitnik za lice ili zaštitne naočale, kape i kacige
 - 5) zaštitna sredstva za zaštitu organa sluha.
 - c) Posebna zaštitna oprema prema vrsti posla koji obavlja, za svakog izvođača preventivnih DDD mjera:
 - 1) jednu filtarsku polumasku (jednokratne ili višekratne) namijenjenu za zaustavljanje suhih aerosola (prašiva) u količini ovisno o broju zaposlenih,
 - 2) jednu filtarsku polumasku ili filtarsku polumasku s filtrima za zaštitu od čestica,
 - 3) jednu masku za cijelo lice s kombiniranim filtrima za zaštitu od plinova i čestica, i
 - 4) za svaku samostalnu ekipu komplet prve pomoći s antidotima za sve otrove s kojima se radi, kao i osnovnim simptomatskim lijekovima, tlakomjerom, stetoskopom te uputom za primjenu prve i medicinske pomoći u slučaju trovanja.

Član 10.

- (1) Nosioци odobrenja iz stava (3) člana 2. ovog pravilnika moraju imati vlastiti poslovni i skladišni prostor u skladu s posebnim propisima koji regulišu promet otrova.
- (2) Izuzetno, skladišni prostor može biti i zakupljen, ali zakup mora biti definiran najmanje na period izdavanja odobrenja.
- (3) Skladišni prostor iz stava (1) ovoga člana mora imati:
 - a) prostoriju za smještaj, čuvanje i izdavanje preparata za DDD koja uključuje upotrebu II i III grupe otrova,
 - b) prostoriju za čuvanje tehničke opreme i aparata za primjenu,
 - c) prostoriju za čuvanje zaštitne opreme,
 - d) prostoriju za garderobu sa po dva garderobna ormarića sa zaštitnom bravom (katancem) ili ključem za svakog radnika u skladištu (jedan za radnu odjeću i lična zaštitna sredstva, a drugi za ličnu garderobu),
 - e) prostoriju za administrativno osoblje,
 - f) sanitarni čvor s tuš kabinom.

2. Drugi uvjeti

Član 11.

- (1) Prostorije za smještaj, čuvanje i izdavanje preparata za DDD iz čl. 6. i 10. ovog pravilnika, koji uključuju upotrebu otrova I, II i III grupe, moraju biti izgrađene od čvrstog materijala za kojeg je nalazom nadležnog tijela utvrđeno da je usklađen sa sanitarno-tehničkim i higijenskim uvjetima u pogledu lokacije, načina izgradnje, kvalitete zidova i podova, osvijetljenosti, prozračivanja, temperature i vlažnosti u skladu sa propisima o prometu otrova.
- (2) Prostorije za smještaj, čuvanje i izdavanje preparata za DDD moraju imati dovoljan broj stabilnih ormara ili policama za njihov smještaj, kako bi se spriječilo mehaničko ili drago oštećenje pojedinačnih pakovanja.
- (3) Prostorije za smještaj, čuvanje i izdavanje preparata za DDD moraju biti pod nadzorom (fizičko obezbjeđenje/ video nadzor/alarmni sistem). Na ulaznim vratima u prostoriju moraju biti istaknute oznake o zabrani pristupa neovlaštenim osobama i vrsti preparata za DDD koje se u prostoriji skladište. Na ormarićima ili policama moraju biti istaknute oznake vrste preparata za DDD koje se skladište.
- (4) Na vidljivim mjestima u prostoriji moraju biti istaknute oznake o zabrani pušenja, uzimanja hrane i napitaka, pisane upute o postupanju u slučaju izlaganja olrovima, oznake upozorenja i obavijesti, telefonski brojevi odgovornih osoba i službi za slučaj nesreće, oznake smjera kretanja u slučaju požara ili drugih nesreća sa otrovima.
- (5) U svakoj prostoriji za smještaj, čuvanje i izdavanje preparata za DDD mora biti najmanje jedan aparat za gašenje požara.

Član 12.

- (1) Oprema koja se koristi u procesu rada iz čl. 6. i 10. ovog pravilnika, mora biti uredno održavana (servisirana) i kontrolisana u skladu sa preporukama proizvođača opreme.

”Službene novine FBiH”, broj: 81/14

- (2) Za svaki uređaj/aparat treba voditi odgovarajuću evidenciju o redovnom etaloniranju i održavanju, periodičnoj validaciji, da bi se osigurala pouzdanost i ispravnost procesa i opreme i o tome voditi pisanu evidenciju.

Član 13.

- (1) Ukoliko se preventivne DDD mjere provode sistematski u skladu sa Pravilnikom o načinu obavljanja dezinfekcije, dezinfekcije i deratizacije, nosioci odobrenja iz st. (2) i (3) člana 2. ovog pravilnika, koji provode ove mjere, moraju ispunjavati uvjete u pogledu opreme i prostora u skladu sa ovim pravilnikom.
- (2) U pogledu kadra, nosioci odobrenja iz st. (2) i (3) člana 2. ovog pravilnika, koji provode preventivne sistematske DDD mjere moraju upošljavati u radnom odnosu na neodređeno vrijeme sa punim radnim vremenom najmanje:
 - a) doktora medicine - specijalistu epidemiologije ili higijene,
 - b) diplomiranog sanitarnog inženjera/bakalaureati zdravlje i ekologija,
 - c) osam kvalifikovanih izvršilaca (diplomirani sanitarni inženjeri/bakalaureati zdravlje i ekologija ili tehničara sanitarno-ekološkog smjera).

III. OBAVEZNA PROTUEPIDEMIJSKA DEZINFEKCIJA, DEZINSEKCIJA I DERATIZACIJA

Član 14.

- (1) Zdravstvene ustanove koje obavljaju djelatnost obavezne protuepidemijske DDD mjere moraju zapošljavati u radnom odnosu na neodređeno vrijeme sa punim radnim vremenom doktora medicine, specijalistu epidemiologije.
- (2) Ako zdravstvena ustanova provodi obaveznu protuepi-demijsku DDD mjeru koja uključuje upotrebu otrova iz I grupe otrova mora udovoljavati uvjetima iz čl. 5, 6, 11. i 12. ovog pravilnika.
- (3) Ako zdravstvena ustanova provodi obaveznu protuepi-demijsku DDD mjeru koja uključuje upotrebu otrova iz II i III grupe otrova mora udovoljavati uvjetima iz čl. 9.-12. ovog pravilnika.

IV. POSTUPAK VERIFIKACIJE

Član 15.

- (1) Utvrđivanje ispunjenosti uvjeta stručne spreme uposlenika, tehničke opremljenosti, prostorija i dragih uvjeta za obavljanje DDD, kao mjere za sprječavanje i suzbijanje zaraznih bolesti stanovništva obavlja Federalno ministarstvo zdravstva (u daljem tekstu: Ministarstvo), a na osnovu podnijetog dokumentiranog zahtjeva pravne osobe i fizičke osobe iz člana 2. ovog pravilnika. (2) Uz zahtjev iz stava (1) ovoga člana prilaže se:
 - a) izvod iz sudskog registra,
 - b) vlasnički list ili ugovor o zakupu poslovnog prostora i prostora za skladištenje preparata za DDD,
 - c) tlocrt prostorija za skladištenje preparata za DDD,
 - d) dokaz o vlasništvu opreme iz člana 6., odnosno 10. ovog pravilnika,
 - e) dokaz o ispunjavanju sanitarno-tehničkih uvjeta, kao i uvjeta za zaštitu na radu i protupožarnu zaštitu,
 - f) potvrda o atestiranoj opremi za rad (za opremu koja podliježe atestiranju),
 - g) specifikacija odgovornih i stručnih osoba iz čl. 3, 4, 7, 8. i 13. ovog pravilnika sa dokazima (stručna sprema, dokazi o položenom kursu za obavljanje DDD mjera, specijalizacija za odgovorno lice, fotokopija radne knjižice i prijave osiguranja),
 - h) ljekarsko uvjerenje za svakoga uposlenika,
 - i) opis organizacije i rada (za fizičke osobe – opis rada),
 - j) dokaz o uplati federalne takse,
 - k) dokaz o uplati naknade za rad stručne komisije

Član 16.

- (1) Po prijemu uredno dokumentiranog zahtjeva iz člana 15. ovog pravilnika, federalni ministar zdravstva (u daljem tekstu: federalni ministar) imenuje stručnu komisiju od najmanje tri člana, koju čine doktor medicine-specijalista preventivne grane medicine, magistar farmacije i diplomirani pravnik.
- (2) Komisija iz stava (1) ovog člana formira se sa zadatkom da kod podnosioca zahtjeva izvrši neposredan uvid, te utvrdi ispunjenost uvjeta prostora, opreme i kadra za izdavanje odobrenja za obavljanje DDD mjera.
- (3) Komisija iz stava (1) ovog člana sačinjava zapisnik koji je sastavni dio dokumentacije na osnovu koje se izdaje odobrenje za rad podnosiocu zahtjeva.
- (4) Komisija iz stava (1) odgovara za istinitost podataka navedenih u zapisniku iz stava (3) ovog člana.
- (5) Članovima stručne komisije pripada naknada za rad, čiju visinu utvrđuje federalni ministar posebnim rješenjem.

Član 17.

- (1) Na osnovu podnijetog dokumentiranog zahtjeva, a po provedenom upravnom postupku utvrđenom članom 16. ovog pravilnika, federalni ministar donosi rješenje.
- (2) Rješenje federalnog ministra donijeta u smislu stava (1) ovog člana je konačno u upravnom postupku.
- (3) Protiv rješenja federalnog ministra iz stava (2) ovog člana može se pokrenuti upravni spor kod nadležnog suda saglasno Zakonu o upravnim sporovima.

Član 18.

- (1) Ako tokom obavljanja DDD mjera nastanu promjene u vezi ispunjavanja uvjeta na osnovu kojih je izdato rješenje iz člana 17. ovog pravilnika, nosilac rješenja je obavezan o navedenim promjenama obavijestiti Ministarstvo, i to u roku od 30 dana od dana nastupanja promjene.
- (2) U slučaju iz stava (1) ovog člana, nosiocu rješenja koji više ne ispunjava uvjete propisane ovim pravilnikom, federalni ministar rješenjem ukida dodijeljeno odobrenje za obavljanje DDD mjera.
- (3) Rješenje iz stava (2) ovog člana je konačno u upravnom postupku i protiv istog se može pokrenuti upravni spor kod nadležnog suda, saglasno Zakonu o upravnim sporovima.

Član 19.

Ako nosilac odobrenja prestane obavljati djelatnosti u skladu sa izdatim odobrenjem iz člana 2. ovoga pravilnika obavezan je o tome u pisanom obliku obavijestiti Ministarstvo.

V. ZDRAVSTVENI PREGLEDI

Član 20.

Za uposlenike koji obavljaju poslove dezinfekcije, dezinsekcije i deratizacije obavezan je zdravstveni pregled prije početka obavljanja poslova (ljekarsko uvjerenje) i periodični zdravstveni pregled tokom obavljanja tih poslova, a u skladu sa posebnim propisima o zaštiti na radu.

VI. KONTINUIRANA EDUKACIJA

Član 21.

- (1) Odgovorne osobe i svi neposredni izvršioci preventivnih i protivepidemijskih DDD mjera, obavezni su se kontinuirano usavršavati.
- (2) Program kontinuirane edukacije iz stava (1) ovoga člana za odgovorne osobe i sve neposredne izvršioce obaveznih DDD mjera donosi federalni ministar, a na prijedlog Zavoda za javno zdravstvo Federacije Bosne i Hercegovine uz saglasnost kantonalnih zavoda za javno zdravstvo.
- (3) Kontinuirana edukacija se organizuje svake godine prema programu iz stava (2) ovog člana.
- (4) Neposredni izvršioci obaveznih preventivnih DDD mjera obavezni su pohađati i završiti edukaciju iz dezinfekcije, dezinsekcije, deratizacije i asanacije prema programu iz stava (2) ovog člana.

Član 22.

- (1) Kontinuiranu edukaciju provode nadležni kantonalni zavodi za javno zdravstvo, a u saradnji sa Zavodom za javno zdravstvo Federacije Bosne i Hercegovine i fakultetima zdravstvenih studija na kojima postoji smjer sanitarnog/ekološkog inženjerstva, a prema programu edukacije iz stava (2) člana 21. ovog pravilnika.
- (2) Provjeru znanja obavlja Ispitna komisija koja se sastoji od tri člana, a koju imenuje nadležni kantonalni zavod za javno zdravstvo, koji provodi edukaciju.
- (3) Ispitna komisija iz stava (1) ovog člana imenuje se na period od dvije godine.
- (4) Rješenjem o imenovanju Ispitne komisije određuje se predsjednik.

Član 23.

- (1) Provjeru znanja organizuje nadležni kantonalni zavod za javno zdravstvo, koji provodi edukaciju.
- (2) Provjeri znanja može pristupiti samo polaznik edukacije koji je redovno pohađao nastavu prema utvrđenom programu edukacije.
- (3) Provjera znanja vrši se pismeno i usmeno.
- (4) Provjeri znanja može se pristupiti najviše dva puta, s tim da između provjera znanja mora proći najmanje mjesec dana.
- (5) U slučaju da polaznik edukacije i nakon druge provjere znanja ne zadovolji, upućuje se na ponovno pohađanje edukacije.

Član 24.

- (1) Polazniku edukacije koji je uspješno završio provjeru znanja iz oblasti obaveznih DDD mjera izdaje se uvjerenje o uspješno završenoj kontinuiranoj edukaciji.
- (2) Uvjerenje iz stava (1) ovog člana potpisuje direktor kantonalnog zavoda za javno zdravstvo i predsjednik Ispitne komisije iz člana 22. stav 4. ovog pravilnika.

Član 25.

- (1) Troškove edukacije, kao i završne provjere znanja posebnim rješenjem utvrđuje nadležni kantonalni zavod za javno zdravstvo koji obavlja edukaciju.
- (2) Troškove edukacije, kao i završne provjere znanja snose pravne i fizičke osobe, nosioci odobrenja za obavljanje DDD mjera, a koji upućuju polaznike na edukaciju saglasno odredbama ovog pravilnika.

VII. CERTIFIKACIJSKE ISKAZNICE

Član 26.

- (1) Neposredni izvršioci DDD mjera moraju posjedovati plastificiranu identifikacijsku iskaznicu dimenzija 105x70mm, prema obrascu koji je sastavni dio ovog pravilnika (Obrazac broj 1.).
- (2) Identifikacijska iskaznica iz stava (1) ovoga člana mora sadržavati:
 - a) naziv i adresu nosioca odobrenja za provođenje DDD mjera,
 - b) fotografiju izvođača DDD (veličine 25x35mm),
 - c) ime i prezime izvođača DDD mjera, te JMBG,
 - d) broj rješenja i datum izdavanja odobrenja za obavljanje DDD mjera.
- (3) Identifikacijska iskaznica osobe kojoj je odobrena upotreba preparata za DDD koje uključuju upotrebu otrova I grupe označena je crvenom bojom, a iskaznica kojom je odobrena upotreba preparata za DDD koja uključuje upotrebu otrova II i III grupe označena je zelenom bojom.
- (4) Identifikacijske iskaznice za izvođače DDD mjera ovjerava Ministarstvo i potpisuje federalni ministar.

VIII. EVIDENCIJE

Član 27.

Nosilac odobrenja dužan je voditi evidenciju o provedenim DDD mjerama, potrošnji preparata za DDD, te izrađivati zbirne izvještaje i dostavljati ih na način i u rokovima određenim Pravilnikom o načinu obavljanja dezinfekcije, dezinsekcije i deratizacije.

Član 28.

- (1) Pravne i fizičke osobe iz stava (2) člana 2. ovog pravilnika obavezne su o obavljenoj dezinfekciji, dezinsekciji i deratizaciji voditi evidenciju.
- (2) Evidencija se vodi na izvještajnom obrascu koja je sastavni dio ovog pravilnika (Obrazac broj 2).

Član 29.

- (1) Pravne i fizičke osobe koje obavljaju dezinfekciju, dezinsekciju i deratizaciju obavezne su polugodišnje pismeno izvještavati nadležni zavod za javno zdravstvo kantona o obavljenim mjerama dezinfekcije, dezinsekcije i deratizacije, te o vrstama i količinama utrošenih sredstava za dezinfekciju, dezinsekciju i deratizaciju.
- (2) Zavod za javno zdravstvo kantona dostavlja izvještaj Zavodu za javno zdravstvo Federacije Bosne i Hercegovine koji priprema izvještaj za federalnu zdravstvenu inspekciju.

IX. PRELAZNE I ZAVRŠNE ODREDBE

Član 30.

Pravne i fizičke osobe koje obavljaju dezinfekciju, dezinsekciju i deratizaciju saglasno propisima koji su bili na snazi prije stupanja na snagu ovog pravilnika, obavezne su se uskladiti s odredbama ovog pravilnika najkasnije u roku 6 mjeseci od dana stupanja na snagu ovog pravilnika.

Član 31.

Danom stupanja na snagu ovog pravilnika prestaje važiti Pravilnik o uvjetima u pogledu stručne spremljenosti, tehničke opremljenosti, prostorija i drugih uvjeta kojima moraju udovoljavati zdravstvene ustanove, privredna društva odnosno fizičke osobe - obrtnici za obavljanje dezinfekcije, dezinsekcije i deratizacije ("Službene novine Federacije BiH", br. 60/06 i 82/06).

Član 32.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-6289/14

30. septembra 2014. godine Sarajevo Ministar Prof. dr. Rusmir Mesihović, s. r.